

八德須知

八德須知 庚午年六月

忠 - 上事於君 下交於友 內外一誠 終能長久
孝 - 敬父如天 敬母如地 汝之子孫 亦復如是

宋丞相文天祥書

彌倫天地者，道。有得於心者，德。德之精華曰仁。孝，仁之本也。弟，仁之序也。忠，仁之中也。信，仁之符也。禮，仁之節也。義，仁之宜也。廉，仁之界也。恥，仁之徵也。此八者，無往而不在，其乾坤之綱維人物之生機乎，於是乎可以衛道矣。

庚午秋西昌李時品敬贊

詩云。民之秉彝。好是懿德。

德之目有八。固修道者之所重也。然必明善以復其初。始能永敦夫八德。否則一視聽。一言動。與道相背而馳。何敦德之可望。閩侯黃君繼谷。篤學之士也。生平致力於明善復初。殆無閒昕夕。其以八德拳拳服膺。而蒐集史傳以證之。效法紫陽。當亦先哲之所許歟。夫誠於中者必形諸外。竊見黃君品格端。性情厚。對於慈善舉。輒自忘其貧。竭力以營之。而不令人知。如李士謙所謂陰德猶耳鳴者。殆不一端也。其所編輯。特餘事耳。抑亦可以窺見一斑矣。歲在己巳。嘉平之月。贛省

平理安先生由北平至閩。對於修道敦德之士。不憚勤詢。^{鳳琦}與黃君交逾廿載。知其崖略。既舉以告先生。而復介紹其所編輯。且述黃君意。請先生賜以南鍼。先生好善有誠。當必欣然允許歟。前賢有言。百世勸人以書。黃君編輯此書之用心。平先生贊成付梓之至意。均^{鳳琦}所崇拜。因自忘固陋。謹貢其一孔之見。而為之序。

1930年庚午穀雨後五日長樂郭^{鳳琦}序

序

乾坤板蕩。聖學榛蕪。電掣颯馳。瞬息萬變。有心者怒焉憂之。^瑤舌耕餬口。觀兒童氣質。桀驁狡憤者固多。而純粹沉潛者蓋少。推其故對於八德之旨有未諳也。爰於課餘之暇。本朱文公二十四孝之例。隨復節錄舊聞。編成八德須知。日講一二則。為兒童先入之主。冀莘莘青年。今日在塾為好學生。長而立於國家社會。為傑士。為正人。舉倫常日用飲食之間。時時以八德為先河。庶稍蓋^瑤頻年教讀之愆。諸兒童收善良之果。至管見蠡測。閒有未詳。尚祈 博雅君子。匡所不逮。此^瑤所厚望也夫。

福州黃宗瑤繼谷識

八德須知

福州黃宗瑤繼谷編輯

八德須知 庚午年六月

● 朱文公二十四孝節錄

➤ 孝感動天

虞舜瞽瞍之子。性孝。父頑。母嚚。弟象傲。舜耕歷山。象為之耕。鳥為之耘。孝感如此。堯讓以位焉。

➤ 親嘗湯藥

漢文帝，生母薄太后。病三年。帝目不交睫。衣不解帶。湯藥非口親嘗。不敢進。

➤ 嚙指心痛

曾參事母孝。採薪山中。家有客至。母無措。嚙指以悟之。參忽心痛。急負薪歸。跪問其故。母曰。有急客至耳。

➤ 單衣順母

閔損喪母。後母生二子。衣以棉絮。衣損蘆花。御車失鞿。父知故。欲出後母。損曰。母在一子寒。母去三子單。

➤ 為親負米

子路家貧。嘗食藜藿。為親負米。親沒。游楚。從車。積粟。列鼎。累裋。乃歎曰。雖欲食藜藿。為親負米。不可得也。

➤ 鹿乳奉親

鄴子父母年老。俱患雙眼。思食鹿乳。鄴子衣鹿皮。入鹿群中。取以奉之。獵者欲射之。鄴子陳情。乃免。(鄴音談 古國名 太昊氏之後)

➤ 戲綵娛親

老萊子奉親極甘脆。年七十。不稱老。嘗著綵衣戲親側。又取水誤跌。作小兒啼以娛親。

➤ 賣身葬父

董永賣身貸錢葬父。及去償工。遇婦求為永妻。俱至主家。月織縑三百疋。歸至槐陰。辭永而去。(縑音兼 絹之細密者)

➤ 為母埋兒

郭巨貧乏。不能供母。有子三人。分母之食。巨謂妻曰。兒可再有。母不復得。盍埋兒乎。掘坑得金。以全其孝。

➤ 湧泉躍鯉

姜詩母性好江水。妻龐氏。汲而奉之。更嗜魚膾。召鄰母共食。舍側湧泉如江水。日躍雙鯉以供母。

➤ 拾椹供親

蔡順少孤。事母孝。遭王莽亂。拾桑椹盛以異器。赤眉賊問何異。順曰。黑奉母。赤自食。賊憫之。以牛米贈。

八德須知 庚午年六月

➤ 刻木事親

丁蘭蚤喪父母。長念劬勞之恩。刻木為像。事之如生。妻久不敬。鍼刺其指而血出。蘭詢其情。將妻棄之。

➤ 懷橘遺親

陸績六歲。見袁術。術出橘待。績懷二枚。辭歸。墮地。術笑曰。陸郎懷橘乎。績曰。母性所愛。請歸遺母。術奇之。

➤ 行傭供母

江革獨與母居。遭亂。負母逃難。賊數欲劫去。革泣告有老母。賊不忍殺。轉客下邳。行傭供母。諸物畢給。

➤ 扇枕溫衾

黃香九歲失母。事父盡孝。夏天暑熱。扇涼其枕席。冬天寒冷。以身溫其衣被。太守劉護表而異之。

➤ 聞雷泣墓

王裒母性畏雷。卒。葬山林。裒廬墓。每遇風雨。聞雷聲。即拜泣曰。裒在此。母勿懼。

➤ 恣蚊飽血

吳猛八歲。家貧。榻無幃帳。每夏夜。任蚊攢膚。恣渠膏血之飽。雖多不驅。恐去己而噬親也。

➤ 卧冰求鯉

王祥早喪母。繼母朱氏不慈。數譖於父而失愛。母嗜生魚。時冰凍。祥解衣卧冰求之。冰裂。鯉躍。持歸供母。

➤ 搯虎救親

楊香年十四。隨父豐穫粟。虎曳父去。香手無寸鐵。挺身向前。搯持虎頸。虎磨牙而逝。父得免害。

➤ 哭竹生筍

孟宗母老。疾篤。冬月思食筍羹。宗無計可得。抱竹而哭。須臾地裂。出筍數莖。持歸作羹。母食病愈。

➤ 嘗糞憂心

庾黔婁到任未旬日。心驚汗流。棄官歸。父始病。醫云。欲知瘥劇。糞苦則佳。婁嘗之。甜。夕叩北辰。求以身代。

➤ 乳姑不怠

崔山南曾祖母老。無齒。祖母乳其姑。姑不粒食而康。疾篤。宣言無以報新婦恩。願汝孫婦。如新婦之孝敬。(唐崔瑄博陵人。為山南西道節度使。故稱山南)

八德須知 庚午年六月

➤ 棄官尋母

朱壽昌生母劉氏。為嫡所嫁。不相見者五十年。神宗朝。棄官入秦。辭家。訣誓。不見母不還。行次同州。得之。

➤ 滌親溺器

黃庭堅元佑中為太史。性至孝。身雖貴顯。奉母盡誠。每夕為親滌溺器。無一刻不供子職。

● 二十四悌節錄

➤ 舜封有庠

舜之弟象。日以殺舜為事。及為天子。封之有庠。孟子曰。親之。欲其富也。愛之。欲其貴也。

➤ 大封同姓

武王克商。諸侯受命。大封建於天下。封兄弟之國十五人。姬姓之國四十人。子孫不狂惑者。皆為諸侯。

➤ 幼知讓梨

孔融四歲。與諸兄共食梨。融輒引小者。大人問其故。答曰。我小兒。須當取小者。宗族奇之。

➤ 大被同眠

後漢。姜肱與弟仲海 季江甚友愛。雖各娶。不忍別寢。作大被同眠。

➤ 敬事寡嫂

馬援事兄況甚謹。況卒。行服期年。不離墓所。敬事寡嫂。不冠不入廬。

➤ 遇賊爭死

後漢趙孝弟禮。為餓賊所得。將食之。孝聞之。即自縛詣賊曰。禮久餓羸瘦。不如孝肥飽。賊大驚。並放之。

➤ 閉戶自撾

繆彤少孤。兄弟同居。及各娶妻。諸婦遂求分異。彤閉戶自撾。弟及諸婦聞之。悉謝罪。更為敦睦之行。(繆音妙 姓也。彤音融。撾張瓜切擊也)

➤ 惟取圖書

王曇首。瑯琊臨沂人。太保弘少弟也。除著作郎。不就。兄弟分財。曇首惟取圖書而已。

➤ 盡心奉嫂

顏含兄沒。嫂樊氏失明。含每日省藥問耗。必簪履束帶。醫人疏方。須蚘蛇膽。含求得之。藥成。嫂愈。

八德須知 庚午年六月

➤ 束帶應兄

南齊劉璣夜呼弟璉不答。至下床著衣。立然後聽。璣怪其遲。璉曰。向來束帶未完。故不敢應耳。(璣音桓。璉音津)

➤ 先令抱弟

徐湛之與弟淳之同車。牛奔輪折。路人來救。湛之令先抱弟去。而後自下。

➤ 不肯獨食

裴安祖少聰慧。九歲時。師講詩。至呦呦鹿鳴。食野之苹。語諸兄曰。鹿得食相呼。而況人乎。自後未嘗獨食。

➤ 殺牛不問

隋牛弘弟弼。嘗醉殺弘駕車牛。弘還家。妻曰。叔射殺牛。弘答曰。作脯。坐定。又曰。叔射殺牛。弘曰。已知之矣。

➤ 孚及畜犬

江州陳褒宗族七百口。每食設廣席。長幼以次坐而共食。畜犬百餘。共一牢食。一犬不至。諸犬為之不食。

➤ 紫荊復榮

田真 田慶 田廣欲分財。堂前紫荊樹一株。議砍為三。曉即憔悴。真感歎。遂不分。紫荊復榮茂如故。

➤ 樓建花萼

唐元宗素友愛。為長枕大被。與兄弟同寢處。設五帷幄。與諸王處其中。題其西樓曰。花萼相輝之樓。

➤ 讓封遺孤

唐魏徵以定五禮。當封一子縣男。徵請封孤兄子叔慈。帝愴然曰。此可以勵俗。

➤ 煮粥燃鬚

李勣性友愛。其姊病。嘗自煮粥。而燎其鬚。姊戒止之。答曰。姊多疾。而勣且老。雖欲數進粥。尚幾合時。

➤ 灼艾分痛

宋太祖趙匡胤。性友愛。弟匡義疾。灼艾覺痛。太祖亦取艾自灼。以分其痛。

➤ 頻問寒飢

司馬光兄伯康。年將八十。公奉之如嚴父。保之如嬰兒。食少頃。問曰。得無飢乎。天少冷。則拊其背曰。衣得無薄乎。

➤ 不較酒失

宋周文燦。兄嗜酒。仰燦為生。嘗醉毆燦。鄰人不平。燦怒曰。兄未毆汝。何離開我兄弟也。

八德須知 庚午年六月

➤ 躬侍兄疾

范純仁兄純祐有心疾。奉之如父。藥膳居服。皆躬親之。宋庠薦試館職。謝曰。輦轂之下。非兄養疾地也。

➤ 不辨母乳

元張閏八世同居。婦人各聚一室。無私藏。幼稚涕泣。諸母見者抱哺。不問誰為己兒。兒亦不知誰為己母。

➤ 不聽婦言

明鄭濟十世同居。太祖問何以得此。濟對曰。惟不聽婦人言耳。

● 二十四忠節錄

➤ 因諫剖心

比干見紂王暴虐。曰。君有過而不以死爭。則百姓何辜。乃強諫。紂怒曰。吾聞聖人之心有七竅。遂剖其心。

➤ 為韓報仇

張良以五世相韓。秦滅韓。良欲復仇。求力士。為鐵椎。重百二十斤。狙擊秦皇於博浪沙中。誤中副車。

➤ 陵母知興

王陵以兵屬漢。項羽取陵母置軍中。欲以招陵。陵使至。母曰。語陵善事漢王。無以妾故。持二心。遂伏劍。

➤ 請斬佞臣

朱雲為槐里令。請尚方劍。斬佞臣張禹。上怒。命斬之。雲攀折殿檻。呼曰。臣願從龍逢 比干遊地下。足矣。

➤ 持節牧羊

蘇武使匈奴。單于使武北海上牧羝。羝乳乃得歸。武杖漢節牧羊。臥起操持。節旄盡落。積十九年乃歸。

➤ 閉戶思過

漢韓延壽為馮翊令。有昆弟訟田。延壽曰。是我教化不行。遂閉戶思過。訟田者髡鉗謝罪。以田相讓焉。

➤ 斷頭將軍

張飛破巴郡。獲守將嚴顏。飛曰。何不降。顏曰。我州但有斷頭將軍。無降將軍。飛壯而釋之。引為上客。

➤ 血濺御衣

嵇紹從惠帝戰於蕩陰。大敗。百官皆奔。紹獨以身衛。飛箭雨集。死之。血濺御衣。事定。帝曰。嵇侍中血。勿浣。(嵇音奚。嵇山在河南修武縣西北，以嵇康居此而得名。俗讀如嵇。)

八德須知 庚午年六月

➤ 克復神州

晉王導謂諸名士曰。當戮力王室。克復神州。何至作楚囚對泣耶。

➤ 未嘗屈體

唐韋思謙為御史。性蹇諤。見王公未嘗屈體。或譏之。曰。耳目之官。固當特立。鵬鷖鷹鷂。豈眾禽之偶耶。

➤ 剖心護儲

樂工安金藏、時有誣皇嗣反。武后詔鞠之。藏大呼。引刀剖胸。五臟並出。后曰。吾有子不能自明。不如爾之忠也。

➤ 守節不降

顏真卿為平原太守。李希烈反。朝廷使勸諭。烈欲降之。卿叱曰。汝知吾兄杲卿罵賊而死乎。吾惟守節。希烈謝之。

➤ 千秋金鑑

唐玄宗千秋節。群臣皆獻寶鏡。張九齡乃述前朝興廢之源。謂之千秋金鑑錄。上之。帝喜。賜御書褒美。

➤ 誓平淮西

唐裴度言淮西乃心腹之疾。不得不除。臣誓不與此賊俱生。因請自督戰。雪夜入蔡州。擒吳元濟送京師。城降。

➤ 自明不反

唐尉遲恭屢立大功。上曰。人言卿反。何也。對曰。臣百戰定天下。何反為。遂解衣投地。出癍痕。上流涕撫之。(尉遲複姓)

➤ 焚香薦士

宋謝泌為諫議。不妄許可。每發一薦牘。必焚香望闕。再拜曰。老臣又為陛下得一人矣。

➤ 天下己任

范仲淹為秀才時。便以天下為己任。嘗自言曰。先天下之憂而憂。後天下之樂而樂。及為相以十事上之。(十事：明黜陟。抑僥倖。精貢舉。擇長官。均公田。厚農桑。修武備。推恩信。重命令。減徭役。)

➤ 不媚上官

周敦頤為南安司理。有囚。法不當死。轉運使王逵深惡之。頤棄官曰。殺人以媚人。吾不為也。逵悟。囚乃得釋。

➤ 奏陳民困

宋李沆為相時。屢取四方之水旱盜賊。奏於上前。不阿。語極痛切。民得以安。

八德須知 庚午年六月

➤ 圖繪流民

鄭俠監安上門。時亢旱。進流民圖。曰。陛下觀圖。十日不雨。斬臣宣德門外。神宗罷新法十八事。越三日雨。

➤ 薑柱愈辛

宋晏敦復諫和議。秦檜使人諭而誘之。敦復曰。吾不以身誤國家。秉薑桂之性。老而愈辣。請勿言。

➤ 衣帶明心

宋文天祥勤王兵敗。為元所獲。戮於柴市。視衣帶書云。孔曰成仁。孟曰取義。惟其義盡。所以仁至。讀聖賢書。所學何事。而今而後。庶幾無愧。

➤ 盡忠報國

岳飛大舉伐金。兀朮憚之。秦檜主和。誣飛逗遛舒蘄。棄山陽不守。捕飛。飛示以背鑄盡忠報國四大字。

➤ 先輸租稅

高繼成有田百畝。租人必先納稅。曰。草莽中。惟有此。始可為忠義之士。

● 二十四信節錄

➤ 桐葉封弟

周成王年幼。與弟叔虞戲。削桐葉為珪。曰。以封汝。史佚因請封叔虞。王曰。戲耳。史佚曰。天子無戲言。遂封叔虞於唐。

➤ 不背柯盟

柯之盟。曹沫以匕首劫齊桓公。請反魯侵地。桓公許之。已。欲背盟。管子曰。棄信於諸侯。失天下之援。不可。乃反魯侵地。諸侯聞之。皆信齊而附焉。(曹沫魯人，以勇力事莊公。齊桓公伐魯。莊公請獻隧邑以平。魯與齊會盟於柯。)

➤ 挂劍墓樹

吳季札聘晉。帶劍以過徐君。徐君不言。而色欲之。札心許而未獻。及反。徐君已死。札脫劍挂徐君墓樹而去。

➤ 忠信濟水

孔子於河梁息駕。忽一丈夫。橫渡過水。孔子問曰。巧乎能入而復出也。對曰。吾以忠信故也。孔子曰。弟子識之。水且以忠信濟。而況人乎。

➤ 買豚教信

孟子幼時。問東家殺豚何為。母曰。欲啖汝。既而悔曰。吾聞古有胎教。今適有知而欺之。是教之不信也。乃買豚肉以食之。

➤ 不答贗鼎

齊伐魯。索讒鼎。魯以偽往。齊知其誑。曰。必令柳下惠來言。吾信之。魯以告惠。惠曰。何不以真者與之。魯人曰。吾所愛。惠曰。吾亦愛吾之信。(誑，古況切，欺也。贗，音厲，偽物也)

八德須知 庚午年六月

➤ 冒雨赴獵

魏文侯。天雨命駕適野。左右曰。天雨。君安之。文侯曰。吾與虞人期獵。豈可無一會哉。乃往。身自罷之。

➤ 徙木予金

秦商鞅欲變法。恐民不信。乃立大木於南門。募民能徙置北門者。予五十金。有一人徙之。予五十金。以明不欺。

➤ 一諾千金

漢季布無二諾。楚人諺曰。得黃金百斤。不如得季布一諾。

➤ 戒失期約

陳實與友期行。期日中。過中不至。實舍去。

➤ 候期野亭

郭伋為并州守。行部至西河。童兒數百。各騎竹馬迎拜於道。問使君何日當還。伋計日告之。既還。先一日。伋恐違信。遂止野亭。候期乃入。

➤ 星夜冒難

漢孔融與王修交。修聞融有難。星夜往視。融初謂左右曰。能冒難者。惟王修耳。言訖。而修果至。

➤ 雞黍踐約

范式與張劭遊太學。告歸。式曰。後二年某日。過拜尊親。屆期。劭告母具雞黍候之。母曰。何期之審耶。劭曰。巨卿信士。必不失期。是日果至。

➤ 千里赴期

卓恕還會稽。辭太傅諸葛恪。恪問何日來。恕言某日。至日。恪宴客。停食以待。客皆曰。會稽建康。相去千里。安能來。俄恕至。一座盡驚。

➤ 藥不酖人

羊祜鎮襄陽。與吳將陸抗接境。使命常通。抗遺祜酒。祜飲之不疑。抗疾。祜以成藥與之。抗即服之。人多諫抗。抗曰。豈有酖人羊叔子哉。

➤ 妻子託生

南朝張堪於太學中見朱暉。把臂曰。欲以妻子託。暉不敢對。及堪亡。暉周卹之。暉子頡怪問之。暉曰。堪有知己之言。吾已信於心也。

➤ 守價不二

南朝韓康賣藥不二價。時有女子買藥。康守價不移。女子怒曰。公是韓伯休耶。乃不二價。(韓康字伯休)

➤ 言不妄發

何遠言不妄發。每語人曰。卿若得我一妄語。則謝君一縑。眾共伺之。終莫能得。

八德須知 庚午年六月

➤ 縱囚自還

唐呂元膺為蕪州刺史。歲終錄囚。囚以明日歲旦。不得省親為恨。膺釋歸。而戒還期。吏白不可。膺曰。吾以信待人。人豈吾違。如期果還。

➤ 泛海無恐

段希堯使吳越。時江淮不通。皆泛海。遇大風。左右皆恐。堯曰。吾平生不欺。汝等恃吾。無恐也。已而風止。

➤ 未嘗妄語

司馬光由少至老。未嘗妄語。自言生平所為。無事不可對人言者。

➤ 不棄瞽女

宋劉廷式聘鄉人女。及登第。女喪明。岳家使辭婚。或勸納其幼女。式曰。吾心已許之。豈可負初心哉。卒娶之。

➤ 臨書叩首

宋米芾處友極信。每將書柬於友。至頓首字。必叩首者三。

➤ 稅不復征

明太祖詔免江南稅。秋復征之。右正言周衡進曰。已蠲復征。是示天下以不信也。上從之。

● 二十四禮節錄

➤ 握髮待士

成王封周公之子伯禽於魯。周公戒之曰。子毋以魯國驕士。吾嘗一飯三吐哺。一沐三握髮。以延天下之賢士。

➤ 問禮老聃

孔子謂南宮敬叔曰。吾聞周有老聃。通禮樂之原。明道德之歸。則吾師也。今將往矣。敬叔言於魯君。賜之車馬侍御。與敬叔適周。見老聃而問禮焉。

➤ 下榻留賓

後漢陳蕃為豫章太守。性方峻。杜門謝客。惟徐穉來。特設一榻。去則懸之。(徐穉字孺子。南州隱士)

➤ 下牀答拜

陳實少從樊英學。英嘗有疾。其妻遣婢拜問。英下牀答拜。實怪而問之。英曰。妻，齊也。共奉祭祀。禮無不答。

➤ 獨拜牀下

馬援有疾。梁松候之。獨拜牀下。援不答。松去後。諸子問曰。伯孫帝婿也。朝臣莫不憚之。大人何獨不為禮。援曰。吾乃松父友也。雖貴。何得失序。

八德須知 庚午年六月

➤ 舉按齊眉

梁鴻娶孟光。相敬如賓。避地吳中。依臯伯通家。居廡下。為人賃舂。每歸。妻為具食。不敢仰視。舉按齊眉。通異之。曰。彼傭能使其妻敬之如此。非凡人也。乃舍之於家。(梁鴻字伯鸞。扶風人。孟光字德耀按古盃字。)

➤ 人之師表

荀攸字公達。甚為魏太祖所器。文帝在東宮。太祖謂之曰。荀公達人之師表。汝當盡禮敬之。(魏太祖曹操，字孟德。文帝曹丕。)

➤ 庚子拜經

晉臧榮緒篤愛五經。常以孔子生於庚子日。因於是日陳五經於案上。具衣冠拜之。

➤ 截髮欸賓

陶侃早孤。家貧。范逵往訪。侃倉卒無以欸賓。其母乃截髮為雙髮。易酒肴以餉客。

➤ 起送僚佐

南齊陸慧曉歷輔五政。立身清肅。僚佐造詣。必起送之。或謂曰。長史貴重。不宜妄自謙屈。答曰。我性惡人無禮。不容不以禮處人。

➤ 武夫演禮

張敬兒起自武夫。不習朝儀。聞當內選。乃於室中。屏人學進退趨踰之儀。獨自俯仰其間。侍妾竊窺者。皆匿笑之。

➤ 回面避妓

顏師伯豪貴。設女樂。王琨時為度支尚書。要琨同聽。傳酒行炙。悉用內妓。琨以男女無親授。傳行每至。令置牀上。回面避之。然後取。坐上莫不撫手嗤笑。琨容色自若。(嗤音蚩笑貌)

➤ 閨門嚴肅

王凝常居。慄如也。子弟非公服不見。閨門之內。肅若朝廷焉。

➤ 不營別第

襄成公主適蕭瑀子銳。有司請營別第。樹闕如制。主辭曰。婦事舅姑。如事父母。異宮則定省闕焉。敢即安乎。太宗悅。命即瑀第門。列戟表焉。

➤ 立雪不徙

唐韋斌天資質厚。每朝會。不敢離立笑言。嘗大雪。在廷者皆振裾更立。斌不徙足。雪甚。幾至韉。亦不失容。

➤ 笏傳三世

唐韓臯三世為大臣。傳執一笏。臯以笏經祖父所執。未嘗輕授僕人之手。歸則躬置於臥內榻上。明日出。復自取之。其敬慎如此。

八德須知 庚午年六月

➤ 下馬端笏

柳仲郢端嚴好禮。事叔公權如事父。非甚病。見公權未嘗不束帶。出遇公權於通衢。必下馬。端笏立。候公權過。乃上馬。(柳仲郢公綽子)

➤ 程門立雪

楊時篤志求師。一日往見程頤。頤偶瞑坐。楊時與游酢侍立於旁。久之不去。天甚寒。及頤覺。則門外雪深一尺矣。

➤ 居常不欺

陳了翁閒居時。容止莊敬。言不苟發。一日與家人語。家人戲問是實否。公退自責者累日。曰。吾豈嘗有欺於人耶。何為有此問也。

➤ 侍奉不懈

呂希哲年十歲。侍父母甚敬。不命之坐。不敢坐也。雖盛暑衣服必整齊。不去襪不解帶。

➤ 人不敢戲

王曾在朝。進退皆有常處。平居寡言笑。人莫敢干以私。少與陽億同侍從。億喜談謔。對寮友多狎侮。與曾言。則不敢戲也。

➤ 執弟子禮

潘叔度與呂伯恭同年進士。潘年長。自視其學非伯恭比。即俯首執弟子禮。而師事之。略無難色。朱子甚稱歎之。

➤ 親滌祭器

李鄆年七十餘。享祖考猶親滌器。人或請代之。不從。以為無以達追慕之思也。此可謂祭則致其嚴矣。

➤ 閒居有則

朱子閒居。未明而起。深衣幅巾方履。拜於家廟及先聖。退坐書室。几案必正。書籍器用必整。倦而休也。瞑目端坐。休而起也。整步徐行。其威儀容止之則。自少至老。未嘗須臾離也。

● 二十四義節錄

➤ 夷齊叩馬

武王伐紂。伯夷叔齊叩馬而諫。左右欲兵之。太公曰。此義人也。扶而去之。武王已平殷亂。夷齊恥。不食周粟。隱於首陽山。採薇而食。遂餓而死。

➤ 脫驂館人

孔子之衛。遇舊館人之喪。入而哭之哀。出命子貢脫驂以賻之。(賻音附，以財物助喪儀也。)

八德須知 庚午年六月

➤ 釋石父囚

越石父賢。在繯綫中。晏子出。遭之塗。解左驂贖之。載歸延為上客。（晏子，齊臣。名嬰字平仲。）

➤ 義姑卻敵

齊攻魯。見一婦人。攜一兒抱一兒而行。及軍至。棄其所抱。抱其所攜。齊將問之。對曰。抱者妾兄之子。棄者妾之子也。於是齊將。按兵而止曰。魯未可伐也。婦人猶持節行義。況朝臣乎。魯君聞之。賜予束帛。號曰義姑。

➤ 義不帝秦

秦圍趙。魯仲連適遊趙。聞魏王使將軍新垣衍令趙帝秦。乃見新垣衍曰。彼秦者。棄禮義上首功之國也。權使其上。虜使其民。彼即肆然而為帝。則連有蹈東海而死耳。吾不忍為之民也。（首功。首級之功也。）

➤ 焚券市義

馮驩為孟嘗君收債於薛。矯命以債賜諸民。焚其券。長驅到齊。孟嘗君曰。債收畢乎。來何疾也。曰。收畢矣。君曰。以何市而反。驩曰。竊為君市義。

➤ 厚恤故人

前漢樓護有故人呂公。無子。歸護。護身與呂公，妻與呂姬，同食。及護家居。妻子頗厭呂公。護流涕責其妻子曰。呂公以故舊窮老。託身於我。義所當奉。遂養呂公終身。

➤ 義不背師

平陵云敞。師事同郡吳章。章當世名儒。弟子千餘人。以不附王莽被誅。其弟子皆禁錮。不得仕宦。門人盡更名他師。敞時為大司徒掾。自劾為吳章弟子。收章尸歸葬。京師稱其義。

➤ 義不易妻

光武姊湖陽公主新寡。帝與論群臣。微觀其意。主曰。宋宏威容德器。群臣莫及。帝引見宏。令主坐屏風後。謂曰。諺言貴易交。富易妻。人情乎。宏曰。貧賤之交不可忘。糟糠之妻不下堂。帝顧主曰。事不諧矣。

➤ 分置汲器

管寧客居遼東。時避難者。皆來就之與居。井汲者多爭先鬥鬪。寧乃買器分置井旁。汲以待之。來者各自悔責。

➤ 拔刀向盜

後漢彭修年十五。隨父出行。為盜所劫。修拔佩刀向盜曰。父辱子死。汝不畏死耶。盜驚相謂曰。此童子。義士也。毋逼之。遂解去。

八德須知 庚午年六月

➤ 義存遺孤

李善，李元蒼頭也。元舉家疫死。惟孤兒續。始生數旬。而貲財千萬。諸奴私謀殺續分財。善乃潛負續逃亡。隱瑕邱界中。親自哺養。乳為生湏。續雖孩抱。奉之不異長君。閭里感之。皆相率修義焉。（湏音棟，乳汁也。瑕邱地名，在山東滋陽縣西。）

➤ 秉燭達旦

劉備敗歸袁紹。妻子為曹操所獲。進克下邳。關雲長由張遼約降。隨操歸許。置雲長及昭烈帝后。閉一室中。雲長秉燭達旦。觀春秋。名義凜然。操益重之。厚加禮遇。（下邳。縣名。秦置，故城在今江蘇邳縣東。金時移置。即今邳縣治。許，許昌，今縣名，漢末曹操以漢獻帝都許。曹丕篡位。易名許昌。置縣。故城在今縣城西南。唐屬許州。今改許州曰許昌。屬河南開封道。昭烈，蜀漢劉備稱帝年號。）

➤ 指困相贈

周瑜過魯肅。并求資糧。肅家有米兩困。各三千斛。肅乃指一困贈瑜。瑜奇之。遂結為友。（困，區倫切，又上聲。廩之圓者。）

➤ 義全一郡

荀巨伯遠看友疾。值寇攻郡。友曰。吾今死矣。子可去。巨伯曰。遠來相視。子令吾去。敗義以求生。豈巨伯所行耶。賊至。巨伯請以身代友命。賊相謂曰。我輩無義之人。而入有義之國。遂班師而還。一郡獲全。

➤ 磨鏡會葬

徐穉常事江夏黃瓊。瓊沒。穉往會葬。無資以自致。齎磨鏡具自隨。所在取值。然後得前。（齎音躋，持也）

➤ 好義疏財

郭元振年十六。為太學生。其家嘗送資錢四十萬。有縷服者叩門云。五世未葬。各在一方。今欲同時遷窆。乏於資財。聞公家信至。能相濟否。公即命車一時載去。略無留者。亦不問其姓氏。（窆音砭，葬下棺也。）

➤ 冒刃衛姑

鄭義宗妻盧氏。夜有盜入其室。家人皆竄匿。惟姑老未去。盧氏乃冒刃立姑側。盜義而釋之。姑曰。歲寒知松柏。信然。（盧氏。盧彥衡女。幽州范陽人。）

➤ 放遣乳婦

陳務挺之父名振夜。襲鄴縣。俘其男女千人以歸。去鄴八十里。查婦人有乳汁者。九十餘人。悉放遣之。

➤ 義田贍族

范仲淹平生好施與。擇其親而貧。疏而賢者。咸施之。方貴顯時。置負郭常稔之田千畝。號曰義田。以養濟群族之人。日有食。歲有衣。嫁娶喪葬皆有贍。擇族之長而賢者主其計。而時其出納焉。

八德須知 庚午年六月

➤ 麥舟助葬

范堯夫少時。文正公遣往蘇州。取麥五百斛。見故人石曼卿三喪未葬。留滯丹陽。堯夫即以麥舟付之。到家。公曰。東吳見故舊乎。因道曼卿事。公曰。何不以麥舟與之。堯夫曰。已付之矣。

➤ 遺金以託

巢谷與韓存寶友。存寶犯法當死。謂谷曰。我死。妻子何以為生。幸橐有金。可以貽之。然非君莫託。谷乃變姓名。懷金步往授其子。(巢谷。宋時眉山人。字元聲。舉進士。與蘇轍極相善。)

➤ 視鄉人病

侯可客於外。事畢將歸。聞鄉人病。且旅費已竭。念曰。吾歸則彼死。遂留視其病。調護周至。稍愈。以馬載鄉人。己則徒步歸。(侯可。字無可。宋人。)

➤ 芝麻濟人

元李二輕財好義。值歲饑。鄉人皆困乏。李二家有芝麻一倉。盡以濟人。全活甚眾。時人因稱為李芝麻。

● 二十四廉節錄

➤ 暮夜卻金

楊震性公廉。不受私謁。所舉茂才王密。為昌邑令。夜懷金以遺震。震曰。故人知君。君不知故人。何也。密曰。暮夜無人知者。震曰。天知地知子知我知。何謂無知。密愧而出。

➤ 有三不惑

楊秉，震之中子也。其居官。計日受俸。餘祿不入私門。素性不飲酒。又早喪夫人。遂不復娶。所在以淳白稱。嘗從容言曰。我有三不惑。酒色財也。

➤ 不別治生

諸葛亮自表後主曰。成都有桑八百株。薄田十五頃。子弟衣食。自有餘饒。至於臣在外任。隨身衣食。悉仰於官。不別治生。以長尺寸。若臣死之日。不使內有餘帛。外有贏財。以負陛下。及卒。如其所言。

➤ 載鬱林石

陸龜蒙居姑蘇。其門有巨石。遠祖績嘗為鬱林太守。罷歸無裝。舟輕不能越海。取石為重。人稱其廉。號鬱林石。世保其居。

➤ 生魚懸庭

後漢羊續。為南陽太守。性廉潔。不受人餽遺。府丞獻生魚。續受而懸於庭。丞後又進之。續乃出所懸者示之。以杜其再進。

八德須知 庚午年六月

➤ 投錢於河

漢劉寵為會稽太守。不愛錢。將去官。有五六老叟。各持百錢送之。寵各取一錢受之。出境投之於河。後人因名其河為錢清。

➤ 飲馬投錢

漢安陵項仲山。清節不妄取。每飲馬渭水。必投錢三文而去。

➤ 珠還合浦

孟嘗為合浦太守。郡出珠寶。先時太守多貪珠。責人採求。不知限止。珠遂漸徙於他處。於是行旅不至。人物無資。嘗到官。革前弊。求民利病。未踰年。去珠復還。百姓皆返其業。商賈流通。稱為神明。

➤ 去官留犢

時苗為壽春令。始之官。乘薄笨車。黃犁牛。居官歲餘。牛生一犢。及去。留其犢。謂主簿曰。令初來時。本無此犢。是淮南所生也。

➤ 藏絲不動

山濤領吏部時。袁毅為鬲令。貪濁。常賂遺公卿。以求虛譽。亦遺濤絲百斤。濤不欲異於時。受而藏於閣上。後毅事露。凡所受賂。皆見推檢。濤乃取絲付吏。積年塵埃。印封如故。

➤ 封鮓責子

陶侃少為尋陽縣吏。嘗監魚梁。以一坩鮓遺母湛氏。湛氏封鮓及書。責侃曰。爾為吏。以官物遺我。非惟不能益吾。乃以增吾憂矣。(坩音堪。如缸甕之類。鮓讀如詐。魚之藏貯以為食品者。如鹽魚糟魚之類。尋陽，唐改潯陽。)

➤ 飲水逾清

吳隱之為廣州刺史。未至州二十里。地名石門。有水名貪泉。飲者懷無厭之欲。隱之乃至泉所。酌而飲之。因賦曰。古人云此水。一飲懷千金。試使夷齊飲。終當不易心。及在州。清操逾勵。始終不易。

➤ 單船臨郡

孔奐除晉陵太守。清白自守。妻子並不之官。惟以單船臨郡。所得俸秩。隨即分贍孤寡。郡中號曰神君。

➤ 廉泉讓水

范柏年初見宋明帝。因言及廣州有貪泉。帝問卿州有此水否。對曰。梁州惟有文川武鄉。廉泉讓水。又問卿宅在何處。曰。臣居在廉讓之間。帝善之。授為梁州刺史。

➤ 獨以官貧

房彥謙前後居官。所得俸祿。皆以周卹親友。家無餘財。雖致屢空。怡然自得。嘗顧謂其子元齡曰。人皆因祿富。我獨以官貧。所遺子孫。在於清白耳。

八德須知 庚午年六月

➤ 杯水奉餞

趙軌為齊州別駕。有廉名。徵入朝。父老相送者。各揮涕曰。別駕在官。水火不與百姓交。故不敢以壺酒相送。公清若水。請酌一杯水奉餞。公笑而飲之。(趙軌，隋洛陽人)

➤ 敝簾不易

唐尚書李廙有清德。其妻劉晏妹也。晏嘗造廙。見其門簾甚敝。乃令人潛度廣狹。以粗竹織成。不加緣飾。以贈廙。三攜至門。不敢發言而去。(廙音異)

➤ 南貨投江

唐李勉為廣州刺史。兼嶺南節度觀察使。性廉潔。在官累年。器用車服。無增飾。及歸。停舟石門。悉取家人所貯南貨。投之江中。

➤ 越王石見

虞愿為晉安太守。海邊有越王石。常隱雲霧間。相傳清廉太守乃得見。愿往就觀視。清徹無所隱蔽。

➤ 摘棗挂錢

宋查道嘗出巡所部。路側有佳棗。從者摘以獻。道即計其值。挂錢於樹而去。

➤ 一琴一鶴

趙抃知成都。以寬為治。神宗立。召知諫院。帝曰。聞卿匹馬入蜀。以一琴一鶴自隨。為政簡易。亦稱是乎。

➤ 不持一硯

包拯知端州。遷殿中丞。端土產硯。前守緣貢。率取數十倍以遺權貴。拯命製者。纔足貢數。歲滿。不持一硯歸。

➤ 咬得菜根

汪信民常言。人常咬得菜根。則百事可做。胡康侯聞之。擊節歎賞。(胡安國。字康侯)

➤ 渴不取梨

元許衡嘗於暑日過河南。渴甚。道旁有梨。眾爭取啖之。衡獨坐不顧。或問之。衡曰。物各有主。梨非吾有。不可取也。或曰。世亂此無主。衡曰。梨無主。吾心亦無主乎。卒不取。(許衡字平仲，號魯齋。幼有異質諡文正)

● 二十四恥節錄

➤ 虞芮讓田

西伯陰行善。諸侯皆來決平。虞芮之君。相與爭田。久而不平。乃相與朝周。入境。耕者讓畔。行者讓路。二國之君。感而相謂曰。吾之所爭。周人所恥。我等小人不可以履君子之庭。遂還。俱讓其田而不取。(虞，芮二國名)

八德須知 庚午年六月

➤ 恥為人御

齊晏子之御者。揚揚自得。其妻窺見。責之曰。晏子名顯天下。尚恂恂自下。子揚揚若此。宜乎其卑且賤也。妾恥之。其夫遂學道謙遜。晏子怪問其故。具以實對。晏子嘉其能自新。薦為大夫。(恂恂。信實之貌)

➤ 不食嗟來

齊大飢。黔敖為食於路。以待餓者而食之。黔敖左奉食。右執飲。曰：嗟來食。餓者揚目而視之。曰：予惟不食嗟來之食。以至於斯也。黔敖向之謝過。終不食而死。

➤ 焦思嘗膽

越王勾踐之困會稽也。喟然歎曰。吾終於此乎。大夫種曰。何遽不為福乎。吳既赦越。勾踐反國。乃苦身焦思。置膽於坐。坐臥即仰膽。飲食亦嘗膽也。曰：汝忘會稽之恥耶。

➤ 不食盜雞

樂羊子妻孝而賢。嘗有鄰雞。誤入園中。其姑盜殺而食之。妻對雞不餐而泣。姑問其故。曰。自傷居貧。不能奉母。致食鄰雞之肉。姑覺而棄之。

➤ 盜牛知恥

王烈字彥方。鄉里有盜牛者。主得之。盜請罪曰。刑戮是甘。乞不使王彥方知也。烈聞之。使人遺布一端。或問其故。烈曰。盜懼吾聞其過。是有恥惡之心。既懷恥惡。必能改善。故以此激之。

➤ 甘受胯下

韓信漢之大將也。少時嘗為人戲侮。謂之曰。汝雖長大。好帶刀劍。中情怯耳。能刺死我。不能。出我胯下。信向眾細視。俯出其人胯下。一市皆笑信以為怯。

➤ 瘦羊博士

建武中。每冬日詔賜博士一羊。羊有大小肥瘦。諸博士爭羊不已。欲殺羊分肉。甄宗時為博士。以分羊為恥。因先自取其最瘦者。乃免爭。後帝知其事。因呼宗為瘦羊博士。(建武、東漢光武年號)

➤ 恥為人役

馮良年三十。為尉從佐。奉檄迎督郵。即路。慨然恥在廝役。因壞車殺馬。毀裂衣冠。遁至犍為。從杜撫學。十餘年乃還。(從佐, 謂隨從而已。不主案牘也)

➤ 難得兄弟

乙普明兄弟爭田。致訟。太守蘇瓊諭之曰。天下難得者兄弟。易得者田地。假令得田地。失兄弟。心何如。因而下淚。諸證人莫不灑涕。乙普明兄弟叩頭。乞外更思。分異十年。遂還同住。

八德須知 庚午年六月

➤ 恥事不知

陶宏景幼有異操。讀書萬餘卷。一事不知。以為深恥。雖在朱門。閉影不交外物。惟以披閱為務。朝儀故事。多所取焉。

➤ 恥不知物

吉茂好書。不恥惡衣惡食。而恥一物之不知。

➤ 賜帛激恥

長孫順德以受賕。為有司劾發。太宗因賜帛數十愧切之。大理少卿胡演曰。順德以賂破法。不可赦。奈何又賜之。帝曰。使有恥者。得賜甚於戮。如不能。乃禽獸也。殺之何益。(長孫,複姓。賕,以財枉法也,受贓曰賕)

➤ 開道還瓜

唐秦虞有園在宅北數里。瓜熟。有人踰垣盜之。虞以園多荊棘。恐偷者見人驚走。而致傷損。乃使奴為之開道。及偷負瓜將出。見道通利。知虞使除之。乃送所盜瓜請罪。虞乃懼然。盡以瓜與之。

➤ 韋豈呈身

唐韋澳、武宗朝擢宏詞。十年不調。高元裕欲薦之為御史。諷澳謁己。澳曰。恐無呈身御史。竟不詣元裕之門。宣宗朝官翰林。

➤ 置筍籬外

郭原平宅旁種竹。春月夜。有盜其筍者。偶遇之。盜者奔走墜溝。原平自以不能廣施。至使此人顛沛。乃於所植處溝上立小橋。令足通行。又取筍置籬外。鄰曲慚愧。無復取者。

➤ 憂愧不食

宋薛奎素剛毅。既與政。遂欲繩天下一人於規矩。往往不可其意。則歸卧於家。歎息憂愧輒不食。家人笑其何必若此。公曰。吾慚不乃古人。而懼後世譏我也。

➤ 遷官不受

王韶開熙河。諸將皆以功遷官。知原州桑湜獨辭曰。羌虜畏國威靈。不戰而降。臣何功而遷官。執政曰。眾人皆受。獨君不受。何也。對曰。眾人皆受。必有功也。湜自知無功。故不受。竟辭之。時人重其知恥。

➤ 恥人干謁

紹聖初。唐介子嘉問至京師。謁時相。見一人朱衣象笏。為典客所拒。匍匐從門闥下入。歎曰。士大夫汨喪廉恥。一至此乎。拂衣徑去。

➤ 恥服華服

司馬光為乳兒時。即恥華服。平生衣取蔽寒。惟不垢敝。

八德須知 庚午年六月

➤ 死不愧心

范純仁嘗與司馬光論役法。不合。得免。後朝廷治司馬黨。韓維以執政日與光不合。得免。或勸純仁借維為例。純仁曰。吾昔與君實同朝論事不合。則可。以為今日解脫地。則不可。有愧心而生。孰若無愧心而死乎。

➤ 不鐫碑字

蔡京撰姦黨碑。令郡國皆刻石。長安石工安民。當鐫字。辭曰。民固不知立碑之意。但如司馬相公。海內稱其正直。今謂之姦。民不忍刻也。官欲罪之。泣曰。乞免鐫安民二字於石末。恐得罪於後世。聞者愧之。

➤ 不言貧字

胡安國家至貧。轉徙流寓。遂至空乏。然貧之一字。於親故間。非惟口所不道。亦手所不書。嘗戒子弟曰。對人言貧者。其意將何求。汝曹志之。

➤ 羞致贊儀

王恕嘗語人曰。宋人有言。凡仕於朝者。以餽遺及門為恥。仕於外者。以苞苴入都為恥。今動輒曰。贊儀贊儀。而不羞於人。我寧不自恥哉。恕官太宰。諡端毅。

大羅天上成仙者皆。皆是凡間八德人。有志者盍監諸。

➤ 九美德

- (一)「忠」以盡職責
- (二)「孝」以奉尊親
- (三)「廉」以養儉德
- (四)「節」以保貞操
- (五)「義」以制事宜
- (六)「信」以立交道
- (七)「仁」以待人物
- (八)「惠」以服羣眾
- (九)「禮」以盡謙恭